

O Plan para esta materia é o primeiro destas características en tódalas administracións sanitarias públicas

## O Sergas continúa a desenvolver tarefas para preveni-los riscos laborais

O Servicio Galego de Saúde asume directamente a xestión da Prevención de Riscos Laborais dos seus traballadores con un servicio propio. Éste se constitúe no mes de marzo con dependencia da subdirección xeral de Coordinación e Avaliación Asistencial da

División de Asistencia Sanitaria do Sergas. A Unidade Central, ubicada en Compostela, con funcións de planificación e coordinación, conta con 3 técnicos superiores en prevención de riscos laborais especialistas en hixiene, seguridade e ergonomía.

REDACCION  
A CORUÑA

As actividades levadas a cabo por este servicio do Servicio Galego de Saúde son de varios tipos, comezando pola definición da política de prevención de riscos laborais do Sergas. A tal fin, elaborouse o Plan Xeral de Prevención de Riscos do Sergas (xuño deste mesmo ano).

Neste documento da Administración sanitaria recóllese o compromiso da dirección do departamento sanitario de xestionar os recursos laborais cara unha diminución dos mesmos e unha mellora das condicións de traballo e da calidade de vida laboral.

### Divisións

Dito plan foi presentado ás catro divisiones do Sergas, e, como é preceptivo, ás organizacións sindicais na reunión de xuño da Comisión Central de Seguridade e Saúde.

É de vital importancia darlle a máxima divulgación ó mesmo co fin de cumplir xa un dos principios establecidos no mesmo: implantar unha cultura preventiva positiva e facer chegar a tódolos traballadores da organización a política preventiva do Sergas.

Cómpre destacar que o Plan constitúe o primeiro documento escrito destas características en tódalas administracións sanitarias públicas incluíndo o Insalud.

Ademais, levouse a cabo unha análise da situación actual en prevención de riscos nos centros do Sergas. Esto fixose mediante unha enquisa dirixida a tódolos xerentes de atención primaria e especializada.

Os obxectivos do traballo eran fundamentalmente, por unha banda, coñecer o estado actual en canto ás actividades desenvolvidas nesta materia, así coma os recursos disponibles e o tempo de dedicación a tarefas de prevención de riscos.

### Actividades

Tratábase, por outra banda, de coñecer as actividades feitas ata a data actual en materia de prevención de riscos. Ademais, púxose en marcha o Plan de Formación en Prevención de Riscos Laborais, de xeito que



O Sergas poñerá en marcha este ano sete unidades periféricas de prevención de riscos laborais

neste ano se levan a cabo: tres cursos de cincuenta horas dirixidos a mandos intermedios e oito cursos de dez horas dirixidos a delegados de prevención e membros dos comités de saúde.

Tamén, co fin de poder executalo plan xeral de prevención de riscos na Administración sanitaria, constituiranse, no que queda deste ano, unidades periféricas de prevención de riscos laborais. Serán en total, sete unidades periféricas.

A ubicación física destas unidades será no hospital de referencia e dependerán directamente do xerente, con dependencia funcional da unidade central. O seu principal ámbito de actuación será os traballadores e centros de primaria e especializada.

### Unidades periféricas con técnicos, médicos, ATS e auxiliares administrativos

A posta en marcha das sete unidades periféricas que comenzarán a funcionar este mesmo ano está xa calculada e programada. Cada unha destas unidades periféricas contará cun técnico en seguridade, un médico do traballo, un ATS de empresa e un auxiliar administrativo.

Nas cidades de A Coruña e Vigo haberá, ademais, un técnico en hixiene e un técnico de ergonomía que contarán coa funcionalidade necesaria para dar cobertura a tódolos centros e traballadores do Sergas, sexan do punto que sezan da Comunidade.

Todas estas actividades ten como obxectivo reducir e controlalo risco laboral nos centros de traballo da Administración sanitaria galega, proxecto plasmado nun documento escrito pionero neste campo, que o Sergas pretende normalizar en tódalas súas dependencias para minimizar este problema.

### Principais actividades para o próximo ano

As actividades inmediatas que ten previsto o Sergas para o vindeiro ano, co plan de riscos funcionando prenamente son, en primeiro lugar, que as sete unidades periféricas galegas inicien a avaliación de riscos laborais e a realización de actividades de vigilancia da saúde conforme os criterios establecidos na Lei de Prevención de Riscos, que rixe todo o plan. Ademais, en canto ó servicio central de PRL, o Sergas ten prevista a elaboración do manual de procedemento para a avaliación de riscos.

Tamén está incluido neste proceso o control e coordinación das actividades de avaliación de riscos nos distintos centros, co fin de centralizar os datos e poder obter un completo coñecemento da situación dos centros galegos, algo esencial para poder culminar con éxito este ambicioso plan de loita contra os riscos laborais nas dependencias do Sergas.

### Formación e información en cursos para directivos

O plan do Sergas ocupaase tamén doutros asuntos, todos centrados no mesmo fin, preveni-los riscos laborais na Administración sanitaria. Así, outro dos puntos que se acometerán o ano próximo neste ámbito será o plan de formación e información, que se realizará mediante a introducción de módulos de PRL na totalidade dos cursos que se organicen para directivos do Servicio Galego de Saúde (Sergas).

A Consellería ten prevista a organización de cursos de formación propios dirixidos a traballadores e delegados de prevención. Tamén planea facer cursos de formación dos técnicos das unidades periféricas e do servicio central de PRL.

Deste modo, o novedoso plan tocará tódolos campos e a tódolos traballadores, co gallo de acadar a maior información e, ó tempo, a mellor formación dos traballadores deste sector, o sanitario.